



KEMENTERIAN PERPADUAN NEGARA

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

SEMPENA

**MAJLIS PERASMIAN KICK OFF
SAMBUTAN MINGGU PERPADUAN 2025
PERINGKAT NEGERI MELAKA**

**4 APRIL 2025 (JUMAAT)
8.30 PM
MITC MELAKA**

Salam Perpaduan dan Salam Malaysia MADANI.

SALUTASI

**Salutasi terkini disediakan secara berasingan*

PENDAHULUAN

1. Terlebih dahulu saya ingin mengucapkan ribuan terima kasih kepada seluruh warga kerja Kementerian Perpaduan Negara serta agensi-agensi dibawahnya atas penganjuran **Majlis Perasmian Kick-Off Sambutan Minggu Perpaduan 2025 yang bertempat di Negeri Melaka.**
2. Objektif utama penganjuran program ini adalah untuk **menyebarluas penghayatan terhadap kepelbagaian adat dan budaya dalam masyarakat Malaysia.** Pada tahun ini, Kementerian mengangkat tema **‘Harmoni Dalam Kepelbagaian’** bagi penganjuran sambutan **SMP 2025.**
3. Saya yakin menerusi pendekatan penyatuan nasional ini, ia berupaya memupuk semangat kebersamaan dan kekitaan dalam kalangan rakyat Malaysia. **Rakyat seharusnya turut sama mengambil bahagian dalam mendepani cabaran masa depan iaitu pembinaan Negara Bangsa yang progresif.**

Hadirin yang dihormati sekalian,

SAMBUTAN MINGGU PERPADUAN

4. Untuk makluman semua, pelaksanaan **Sambutan Minggu Perpaduan telah dilaksanakan bermula tahun 2023**, yang telah dirasmikan oleh Duli Yang Maha Mulia Seri Paduka Baginda Yang di-Pertuan Agong ketika itu di Negeri Sarawak. Manakala pada tahun lalu, sambutan peringkat kebangsaan yang berlangsung di Negeri Johor telah dirasmikan oleh YAB Perdana Menteri.
5. Suka untuk saya kongsi, pelaksanaan SMP ini mempunyai daya tarikan tersendiri yang mampu menarik minat golongan muda terutamanya apabila **pelaksanaannya di Negeri Johor tahun lalu yang mengetengahkan pameran 22 Rumah Etnik, perkampungan orang Asli dan Iban serta Malaysia Book of Records bagi “Most Participants in Kacang Pool Eating Session” yang menjadi tumpuan utama.**
6. Mesyuarat YB Menteri Perpaduan Negara Bersama Menteri Perpaduan Sabah dan Sarawak serta EXCO-EXCO Perpaduan Negeri (MExUnity) Bilangan 2 Tahun 2024 telah **bersetuju** agar **Sambutan Minggu Perpaduan Peringkat Kebangsaan Tahun 2025 diadakan di Negeri Pulau Pinang pada Julai ini.**

7. Bagi merencanakan pelaksanaan SMP, beberapa **pengisian tambahan (baharu) akan disertakan pada tahun ini**. Antaranya:

- I. Pameran Negarawan;
- II. Pelaksanaan Wayang Pacak
- III. Bicara Harmoni Perpaduan;
- IV. Pameran Tabika Perpaduan;
- V. Pertandingan Sukan Rakyat Peringkat Komuniti;
- VI. Pertandingan Persembahan Boria
- VII. Pertandingan Ratu Cantik Pakaian Tradisional Pelbagai Kaum;
- VIII. Ronggeng Tradisional;

8. Pelaksanaan program Sambutan Minggu Perpaduan mampu menjadi **wadah perpaduan dan tapak integrasi yang berkesan hingga ke peringkat akar umbi** untuk memperkukuh serta mengeratkan hubungan masyarakat dalam usaha memelihara ekosistem perpaduan.

9. **Kebersamaan dalam pelbagai aktiviti sosial dan interaksi yang aktif merentasi kaum dan generasi dapat merapatkan jurang yang wujud** dan membentuk rakyat Malaysia yang memahami, menerima dan menghormati kepelbagaian yang wujud di negara ini.

Hadirin yang dikasihi sekalian,

RUKUN NEGARA KUNCI KEJAYAAN

10. Saya ingin mengingatkan kita semua bahawa **keharmonian** yang kita nikmati hari ini tidak datang dengan mudah. Ia memerlukan usaha yang berterusan daripada setiap individu di negara ini untuk **meningkatkan kasih sayang dan hormat-menghormati** sesama kita. Keharmonian hanya akan tercapai apabila kita saling menghormati hak dan kepercayaan antara satu sama lain, walaupun terdapat perbezaan pendapat, kepercayaan, budaya, dan latar belakang.

11. Kita perlu sentiasa mengingatkan diri kita bahawa **kepelbagaian itu adalah kekuatan**, dan bukannya penghalang. Perpaduan sejati tercapai apabila kita melihat kepelbagaian sebagai satu peluang untuk saling memahami dan menerima, bukan untuk memecahbelahkan.

12. Rukun Negara merupakan dasar yang sangat penting dalam pembentukan identiti negara Malaysia dan memainkan peranan utama dalam mencapai perpaduan yang utuh di kalangan rakyat pelbagai kaum, agama, dan budaya. Diperkenalkan pada 31 Ogos

1970, Rukun Negara telah menjadi pedoman utama dalam membentuk masyarakat yang harmoni, saling menghormati, dan bertoleransi. Dalam konteks ini, **Rukun Negara bukan sahaja sekadar sebuah prinsip tetapi juga kunci kejayaan perpaduan di Malaysia.**

13. Memandangkan tahun ini, kita akan menyambut **55 tahun Rukun Negara**, maka saya menyeru agar **Kempen Taat Setia Rukun Negara dimulakan dari Negeri Melaka**. Saya yakin perkara ini dapat dilaksanakan dengan sebaik mungkin kerana salah satu program *signature* Negeri Melaka adalah Pidato Rukun Negara.

Hadirin yang dimuliakan sekalian,

PENUTUP

14. SMP merupakan satu seruan untuk kita mengambil langkah bersama ke arah masyarakat yang lebih bersatu. Dalam menghadapi pelbagai cabaran dan perbezaan, kita perlu terus memperkukuh rasa saling hormat, bekerjasama, dan menghargai antara satu sama lain. Inilah kunci kepada kejayaan negara kita dalam menghadapi sebarang rintangan.

15. Setiap individu, tanpa mengira latar belakang atau agama, mempunyai peranan penting dalam memastikan negara kita kekal aman dan harmoni.

16. Dengan itu, saya merasmikan **Majlis Perasmian Kick Off Sambutan Minggu Perpaduan Tahun 2025.**

Sekian, Terima Kasih.